

# Tusagassiorfinnut tapiissuteqartarneq pillugu Inatsisartut inatsisaat

## Kapitali 1

*Atuuffia nassuaatillu*

**§ 1.** Suliniutinut tapiissutit ingerlatsinermullu tapiissutit qinnuteqartoqareerneratigut tusagassiuutinut tapiissuteqartoqarsinnaavoq.

*Imm.* 2. Suliniummut tapiissutit imatut paasineqassaaq ingerlataq aalajangersimasumik anguniagaqarluni inerneqartilluguluunniit piffissami killilikkami ingerlanneqartoq.

*Imm.* 3. Ingerlatsinermut tapiissutit imatut paasineqassaaq ingerlaavartumik ingerlatsinermi aningaasartuutinut, tassunga ilanngullugit sulisunut ininullu aningaasartuutinut, matusissutissatut tapiissutit.

*Imm.* 4. Suliniutinut tapiissutinut ingerlatsinermullu tapiissutinut aningaasaliissutit aningaasanut inatsimmi aalajangersarneqartut iluanni tapiissutigineqartassapput.

**§ 2.** Nutaarsiassanik oqallisaasunillu tusagassiorfinnut namminersortunut, sumulluunniit attuumassuteqanngitsunut, naqitanngorlugit internetimiluunniit allatanik, imarisaannik Kalaallit Nunaanni atuartartunut aaqqissuisartunut nunaniluunniit allani pisunik Kalaallit Nunaanni pissutsinut tunngassuteqartitsisartunut tapiissuteqartoqarsinnaavoq.

*Imm.* 2. Tusagassiorfik namminersortutut isigineqassaaq:

- 1) namminerisaminik aaqqissuisuuneqarfeqarpat,
- 2) naqitikkat amerlassusaannik nammineq nalunaarsinnaappat, aamma
- 3) tusagassianik immikkut pisartagaqartoqarsinnaappat.

*Imm.* 3. Tusagassiorfik sumulluunniit attuumassuteqanngitsutut isigineqassanngilaq:

- 1) pisortani oqartussanit, sulisoqarfinnit imaluunniit suliffeqarfinnit assigisaannilluunniit pisortanit aningaasalersorneqartunit tamakkiisumik ilaannakortumilluunniit pigineqarpat, imaluunniit
- 2) tusagassiorfiup minnerpaamik affaa sulisitsisut, sulisartut, inuussutissarsiutit immikkoortuisa soqutigisaqaqtigilliunniit kattuffinit, tassungalu ilanngullugit politikkikkut partiinit, pigineqarpat.

*Imm.* 4. Tusagassiuutit naqitat imatut paasineqassapput aviisit, atuagassiat saqqummersitalluunniit taakku assigisaat.

*Imm.* 5. Internetikkut tusagassiat allassimasut imatut paasineqassapput internetikkut tusagassiat imarisaat allataanerusut. Assit nipillu imarisaannik tapersiigunik annikinnerusumik ilaasinnaapput.

## Kapitali 2

## *Tapiissuteqarnissamut ataatsimut piumasaqaatit*

**§ 3.** Tapiiffingineqassagaanni piumasaqaataapput:

- 1) tusagassiorfik Kalaallit Nunaanni angerlarsimaffeqassaaq,
- 2) tusagassiorfik piffissami tapiiffingineqarfimmik tamarmi akisussaasumik aaqqissuisoqassaaq,
- 3) ukiumi qinnuteqarfiusumi ukiorluunniit qinnuteqarfik sioqullugu suliffeqarfik qinnuteqartup aallartissimanngippagu tusagassiorfik akisussaalluni aaqqissuisoq peqatigalugu minnerpaamik ukioq tamaat suliffiusunik pingasunik katillugit tiimeqartunik aaqqissuussisartunik sulisoqassaaq,
- 4) saqqummersitat politikkuk, inuiaqtigiinnik kulturimillu sammisaqarfiunerusunik tusagassiortut namminneq suliarisaannik tusagassianik imaqassapput, tassani takoqquaarutit ilanngunnagit imarisaata ikinnerpaamik affai sammisaqarfit assigiinngiiaartut pillugit ilanngutassianik aamma nutarsiassanik oqallisigineqartunik sammisaqarluni aaqqissuisuneersunik tusagassianik imaqassapput,
- 5) inuussutissarsiortut sulianilluunniit suliarinnittartut, sulisut, sulisitsut inuussutissarsiutilluunniit immikkoortuisa kattuffi, politikkuk partiiit sulisoqarfinniluunniit assigiinngitsuni sulisut kisiisa saaffigiinnarnagit atuisunut assigiinngiiaartunut saqqummersitat saaffiginnituussapput, aamma
- 6) saqqummersitat minnerpaamik kalaallisut allassimassapput.

*Imm. 2.* Tapiissuteqarnermi tapiissutinut atasunik piumasaqaateqartoqarsinnaavoq.

## **Kapitali 3**

### *Suliniutinut tapiissutit*

#### *Atuuffia*

**§ 4.** Suliniutinut allaganngorlugit, tassunga ilanngullugit internetikkut, inuiaqtigiini paassisutissanik, tamat oqartussaaneranni oqallinnermik ingerlatitseqqiisarnerit tusagassiorfillu tamatigoortut siuarsarnissaannik siunertaqartunut suliniutinut tapiissuteqartoqarsinnaavoq.

**§ 5.** Suliniutit pilersinnerannut ineriaartortinnerannulluunniit tapiissuteqartoqartassaaq.

*Imm. 2.* Pilersitsinermut tapiissutit suliniutinut, tassunga ilanngullugit nutarsiassanik tusagassiorfinnik pilersitsinermut, tusagassianik tusagassiortut nammineerlutik suliarisaannik ingerlatitseqqiisarnermik siunertaqartunut tapiissutigineqartassapput.

*Imm. 3.* Ineriaartortsinermut tapiissutit tusagassiorfit pioreersut, nammineertut allanngortinnissaannik ineriaartinnissaanniluunniit siunertaqarluni suliniutinut tapiissutigineqartassapput.

*Imm. 4.* Aamma suliniutit imm. 2-mi 3-miluunniit ilaasut pillugit misissueqqaarnermut tapiissuteqartoqarsinnaavoq.

*Imm. 5.* Tusagassiorfiit pineqartut ingerlatsinerannut tapiissuteqarnikkut ataatsimut isigalugu tusagassianik suliaqarnermut tapiissuteqartoqarsinnaanngilaq.

## *Tapiissuteqarnermut piumasaqaatit*

**§ 6.** Suliniutinut, inatsisip atuuffiata iluanittunut, kapitali 2-mi kiisalu §§ 7, 8 aamma 11-mi piumasaqaatit eqortinneqarpata, tapiiffingineqarsinnaatitaasunut missingersuutit 70 %-ii tikillugit

tapiissuteqartoqarsinnaavoq.

**§ 7. Suliniutinut tapiiffigineqassagaanni piumasaqaataapput:**

- 1) tusagassiuut minnerpaamik qaammammut ataasiarluni saqqummertassaaq, imaluunniit internetikkut tusagassiuut pineqarpat ullaat tamaasa nutarterneqartassalluni,
- 2) tusagassiuut atuisunut assigiimmik atugassaqartitsilluni tamanillu pissarsiarineqarsinnaalluni nuna tamakkerlugu pissarsiarineqarsinnaassaaq,
- 3) qinnuteqartoq tusagassiorfik pillugu aningaasatigut imminut napatissinnaasumik ingerlatsinermut pilersaarummik saqqummiissaaq, aamma
- 4) qinnuteqartoq tapiissuteqarnermi piumasaqaataasinnaasunik eqqortitsissaaq.

**§ 8. Suliniut tapiiffigineqartoq, suliniut suli naammassisimanngippat, marloriarluni tapiiffigeqqinnejqarsinnaavoq.**

*Imm. 2. Tusagassiorfik ataaseq ukiumi ataatsimi ataaseq qaangerlugu suliniutinut tapiiffigineqarnissamik qinnuteqarpat, qinnuteqaatit pingarnersiorlugit tulleriinnilorsorlugit tunniunneqassapput.*

*Agguassisarnermut ataatsimiititaliaq*

**§ 9. Agguassisarnermut ataatsimiititaliami Naalakkersuisut pilersitsissapput, taassumalu ukiumoortumik ataatsimiinnermi suliniutinut tapiissutinik qinnuteqaatit tiguneqarnikut suliarisassavai tapiissuteqarnissarlu pillugu aalajangiisassalluni.**

*Imm. 2. Ataatsimiititaliap suleriaasia Naalakkersuisut aalajangersassavaat.*

*Imm. 3. Ataatsimiititaliap aalajangiineri allaffisornermi oqartussanut allanut suliassangortinneqarsinnaanngillat.*

*Imm. 4. Naalakkersuisut ataatsimiititaliamut allatseqartitsissapput.*

**§ 10. Agguassisarnermut ataatsimiititaliaq pingasunik ilaasortoqassaaq, taakkulu ukuninnga innersuussinikkut Naalakkersuisunit toqqarneqartassapput:**

- 1) Ilisimatusarfik ilaasortamik ataatsimik inuiaqatigiilerinermik ilisimasaqartumik innersuussissaq.
- 2) Tusagassiunermi Sulisut Peqatigiiffiat ilaasortamik ataatsimik tusagassiuutilerinermik ilisimasaqartumik innersuussissaq.
- 3) Kalaallit Nunaanni eqqartuussissuserisut peqatigiiffiat ilaasortamik ataatsimik inatsisilerinermik ingerlatsinermilu aningaasaqarnermik ilisimasaqartumik innersuussissaq.

*Imm. 2. Ataatsimiititaliami ilaasortat 18-inik ukioqalereersimassapput, Inatsisartuni, Folketingimi kommunalbestyrelsiniluunniit ilaasortassanik piffissamiillu innersunneqarfimmit ukiuni kingullerni tallimani Kalaallit Nunaanni tusagassiorfinnut tunngatillugu aningaasatigut atassuteqarsimasassanani. Ataatsimiititaliami ilaasortaq tusagassiorfimmut taamatut aningaasatigut atassuteqaleruni ataatsimiititaliamit ingerlaannaq tunuassaaq, tamassumalu kingorna imm. 1 naapertorlugu ilaasortamik nutaaamik toqqaasoqassalluni.*

*Imm. 3. Ataatsimiititaliami ilaasortat piffissamut ukiunut marlunnut toqqarneqartassapput, taammaattorli tak. § 24, imm.3. Ilaasortat toqqaqqinnejqarsinnaapput.*

*Imm. 4. Ataatsimiititaliami ilaasortat Inatsisartuni Naalakkersuisunilu il.il. ilaasortat akissarsiaat il.il.*

pillugit Inatsisartut inatsisaanni kapitali 7-imni malittarisassat malillugit akissarsiaqassapput, ullormusiaqartassallutik angalanermullu aningaasartutinik taartisiaqartinneqartassallutik.

### *Qinnuteqartarneq*

**§ 11.** Tapiiffigineqarnissamik qinnuteqaatit agguassisarnermut ataatsimiititaliap allatseqarfia, tak. § 20, qaammatisiutit malillugit ukiumi suliniutip aallartinneqarfiani kingusinnerpaamik 1. maj tigoreersimassavai.

*Imm.* 2. Suliniutinut ataasiakkaanut tapiiffigineqarnissamik qinnuteqaateqarfiusunut immikkut qinnuteqaatit nassiunneqartassapput. Allaganngorlugu qinnuteqaataassaaq.

*Imm.* 3. Qinnuteqaatinut uku ilanngunneqassapput:

- 1) sulinummik immikkualuttunngorlugu allaaserinninnej,
- 2) missingersuutit ingerlatsinermullu pilersaarut,
- 3) tusagassiorfiup qinnuteqaateqartup tusagassiorfik ukiumi qinnuteqaateqarfiusumi pilersinneqarsimannngippat qaammatisiutit malillugit ukiup siuliani naatsorsuutai aamma
- 4) qinnuteqartup bankkontoanik nalunaarutiginninnej.

### *Naatsorsuutit kukkunersiuinerlu*

**§ 12.** Tapiiffigineqartut suliniutip naammassereernerani kingusinnerpaamik qaammatit pingasut qaangiunneranni tapiissutit atorneqarsimanerat pillugu naatsorsuutinik atsiukkanik nassiussisassapput.

*Imm.* 2. Kr. 150.000-inik sinnerlugilluunniit tapiissutisisimagaanni naatsorsuutit kukkunersiuisumit pisortanit akuerisaasumit imaluunniit kukkunersiuisumit nalunaarsorneqarsimasumit kukkunersorneqarsimassapput.

**§ 13.** Kukkunersiuinermi ileqqut pitsasut naapertorluginukukkunersiuisoqartassaaq.

*Imm.* 2. Kukkunersiuinermi ilaatigut misissorneqassapput:

- 1) tapiissutit siunertamut atorneqarsimanerat,
- 2) tapiissuteqarnermi piumasaqaatit eqqortinnejqarsimanerat,
- 3) sulinummuk naatsorsuutit eqqortuousut aamma annertuunik kukkuneqanngitsut amigaateqaratillu,
- 4) tapiiffigineqartoq aningaasaqarnermik pisariaqartumik mianerinnissimasoq, taamaalilluni suliniut annertuunik aningaasartuuteqarani ingerlanneqarsinnaasimalluni, aamma
- 5) paassisutissat, tapiiffigineqartup suliniut pillugit Naalakkersuisunut nalunaarutigisai uppernarsarneqarsinnaasut.

*Imm.* 3. Naalakkersuisut naatsorsuutinik tigusillattaarillutik misissuissapput.

**§ 14.** Kr. 150.000 inorlugit tapiissutit pillugit kukkunersorneqartassanngilaq.

*Imm.* 2. Tapiiffigineqartup atsiornermigut naatsorsuutit pissutsinik takutitsinerat tapiissutillu siunertamut atorneqarsimanerat akisussaaffigissavai.

*Imm.* 3. Kr. 150.000 inorlugit tapiiffigineqartoq tapiissuteqartumit ataatsimit arlalinnilluunniit allanit tapiissutisisimaguni tamanna pillugu uppernarsaammik Naalakkersuisunut nassiussissaq.

*Imm. 4. Suliniutip naammassineqarneranut nalunaarusiornermi immersugassamik Naalakkersuisut suliarisaannik immersuinissamut nassiussinissamullu Naalakkersuisut tapiiffigineqartoq peqqusinnaavaat.*

## **Kapitali 4**

### *Ingerlatsinermut tapiissutit*

#### *Atuuffia*

**§ 15.** Nuna tamakkerlugu tusagassiuutinut naqitanut inuiaqtigiinni paassisutissanik, tamat oqartussaaneranni oqallinnernik ingerlatitseqqiisarnerup tamatigoortumillu tusagassiisarnermik siuarsaanissamut siunertaqartunut suliaqarnermut ataatsimut isigalugu tapiissutinik ukumoortumik ingerlatsinermut Naalakkersuisut tapiissuteqarsinnaapput.

#### *Tapiissuteqarnermut piumasaqaatit*

**§ 16.** Ingerlatsinermut tapiissuteqarfingineqarnissamut piumasaqaataapput:

- 1) tusagassiuut minnerpaamik qaammammut ataasiarluni nuna tamakkerlugu saqqummertassaaq,
- 2) ingerlatsinermut tapiiffigineqarnissamik qinnuteqaat tamanna pillugu § 17, imm. 1 naapertorlugu piffissarititatut aalajangersarneqartup iluani Naalakkersuisut tigusimassagaat, aamma
- 3) kingusinnerpaamik tapiiffigineqarnissamik qinnuteqaateqartoqarnera peqatigitillugu qinnuteqartup naatsorsuutai kukkunersiusumit oqaaseqaateqarfingineqarnikut kingullit paassisutissallu pisariaqartut Naalakkersuisut tigusimassagaat, tak. § 17, imm. 2 aamma 3.

#### *Qinnuteqarneq akiliinerlu*

**§ 17.** Ingerlatsinermut tapiiffigineqarnissamik qinnuteqaatit qaammatisiutit malillugit ukiumi qinnuteqarnermi pineqartumi (ukiumi tapiissuteqarfiusumi) piffissami 14. novemberimiit 1. december tikillugu Naalakkersuisunit tiguneqareersimassaaq.

*Imm. 2.* Qinnuteqaat allagaassaaq qinnuteqartullu aningaaserivimmi kontoanik, tapiissuteqarnissamut piumasaqaatit eqqortinneqarsimannerannik upternarsaatnik pisariaqartunik, piffissami qinnuteqaatip nassiunneqarnerani saqqummersitat amerlassusaannik ukiullu sinnerani saqqummersinneqartussatut pilersaarutnik imaqassalluni.

*Imm. 3.* Naalakkersuisut qinnuteqaatip suliarineqarnerata ilaaut paassisutissanik amerlanerusunik suliamut tunngassuteqartunik qinnuteqartoq piumasaqaateqarfingisinnavaat, tassunga ilangullugit tapiissuteqarnissamut piumasaqaatit eqqortinneqarnerat pillugu upternarsaatit annertunerusut.

**§ 18.** Ingerlatsinermut tapiissutit aningaasaliissutit aningaasat agguagassat marlunngorlugit agguarlugit aningaasanut inatsimmi aalajangersarneqassapput. Aningaasat agguagassat aappaat tassaassapput tusagassiuutinut minnerpaamik sapaatip akunneranut ataasiarlutik saqqummersartunut tapiissutit. Aningaasat agguagassat aappaat tassaassapput tusagassiuutinut sapaatip akunneranut ataasiarlutik akuttunerusumit minnerpaamilli qaammammut ataasiarlutik saqqummersartunut tapiissutit.

*Imm. 2.* Ingerlatsinermut tapiissutit tusagassiuutit ataasiakkaat ukumi tapiissuteqarfiusumi aningaasat

aguagassat iluanni saqqummersitat tapiiffigineqarsinnaatitaasut amerlassusaannut tamarmiusunut sanilliullugu tapiissuteqarnissamut piumasaqaatinik eqqortitsilluni ukumi tapiissuteqarfiusumi saqqummersitaasa amerlassusaat tunngavigalugu agguaanneqartassapput.

*Imm. 3. Aningaasaliissutit tamarmiusut qinnuteqartuni minnerpaamik ataasiinnarluunniit tapiissuteqarnissamut piumasaqaatinik eqqortitsippat atugassanngortinnejartassapput.*

**§ 19.** Ingerlatsinermut tapiiffigineqarnissamik qinnuteqaatit pillugit Naalakkersuisut aalajangigaat allaffisornermi oqartussanut allanut suliassanngortinnejarsinnaanngillat.

### Kapitali 5

*Allaffissornikkut aqutsineq, nakkutilliineq pineqaatissiarnerlu*

*Suliniutinut tapiissutit*

**§ 20.** Tapiissuteqartarnermi aaqqissuussinermik allaffissornikkut aqutsineq agguaassisarnermut ataatsimiititaliamut allatseqarfittut Naalakkersuisunit ingerlanneqassaaq.

*Imm. 2. Paasissutissat tapiissuteqarnermut tunngaviusut annertuumik allannguiteqarpata tapiiffigineqartoq Naalakkersuisunut ingerlaannaq nalunaaruteqartussaatitaavoq.*

**§ 21.** Inatsit una tapiissuteqarnermullu piumasaqaataasinnaasut naapertorlugit tapiissutit atorneqarnerannik, suliniutinut tapiissut pillugit malittarisassat eqqortinneqarnerannik agguaassisarnermut ataatsimiititaliaq nakkutilliissaq.

*Imm. 2. Suliniummut tapiiffigineqartumut tunngatillugu agguaassisarnermut ataatsimiititaliap tapiissuteqarfigineqartoq nakkutilliinermut pisariaqartunik paasissutisseeqqusinnaavaa.*

**§ 22.** Tapiissuteqarnermut tunngaviit atorunnaartutut nalilerneqarpata tapiissutit agguaassisarnermut ataatsimiititaliap akilerneqartarunnaarsissinnaavai.

*Imm. 2. Imatut pisoqarpat tapiissutit aningaasaliissutit tamakkiisumik ilaannakortumilluunniit utertillugit akilerneqarnissaat agguaassisarnermut ataatsimiititaliap piumasarinsinnaavaa:*

- 1) Tapiiffigineqarnermut piumasaqaatit tapiissuteqarfigineqartup eqqortissinnaajunnaarpagit, tassunga ilanngullugit ingerlatassatut ilimagineqartut ingerlassinnaajunnaarpagit.
- 2) Tapiissuteqarnermi aningaasaliissutinut piumasaqaataasinnaasut tapiissuteqarfigineqartup malinngippagit.
- 3) Tapiissuteqarfigineqartoq qinnuteqarnermut uppernarsaasiornermulluunniit atatillugu eqqunngitsunik salloqittaalluniluunniit paasissutissiisimappat paasissutissanilluunniit pingaaruteqartunik nipangiussisimappat.
- 4) Tapiissuteqarfigineqartup paasissutissanik suliamut attuumassuteqartunik, tassunga ilanngullugit naatsorsuutinik aamma nalunaarusiornermi immersugassamik immersornikumik, paasissutisseerusunngippat.
- 5) Tapiissuteqarfigineqartoq tapiiffigineqarnissamik qinnuteqaammi missingersuutinut sanilliullugu annikinnerusunik suliniummut atuisimappat.

### *Ingerlatsinermut tapiissutit*

**§ 23.** Inatsit una tapiissuteqarnermullu piumasaqaataasinjaasut naapertorlugit tapiissutit atorneqarnerannik, ingerlatsinermut tapiissut pillugit malittarisassat eqqortinnejqarnerannik Naalakkersuisut nakkutilliissapput.

*Imm. 2.* Ukiutuq tapiissuteqarfiusumut tunngatillugu Naalakkersuisut tapiissuteqarfingeqartoq nakkutilliinermut pisariaqartunik qaqugukkulluunniit paassisutiseeqqusinnaavaat.

### **Kapitali 6**

*Atuutilersitsinermut, atorunnaarsitsinermut ikaarsaariarnermullu aalajangersakkat*

**§ 24.** Inatsisartut inatsisaat ulloq 1. januar 2017 atuutilersinnejqarpoq.

*Imm. 2.* Tassunga peqatigitillugu atorunnaarsinnejqarput:

1) Tusagassiorfinnut tapiissuteqartarneq pillugu Namminersorlutik Oqartussat nalunaarutaat nr. 19, 8. oktober 2015-imeersoq

2) Nuna tamakkerlugu tusagassiutinut naqitanut ingerlatsinermut tapiissuteqartarneq pillugu Namminersorlutik Oqartussat nalunaarutaat nr. 10, 26. maj 2016-imeersoq.

*Imm. 3.* Agguassisarnermut ataatsimiititaliami ilaasortat, imm. 2, nr. 1-imi nalunaarummi taaneqartut, piffissaq atuuffiat 30. september 2017 tungaanut ingerlaqqissaq.

*Imm. 4.* Inatsisartut inatsisaata atuutilerneranit ukiut marluk qaangiunneranni inatsisartut inatsisaanni tapiissuteqariaatsinik Naalakkersuisut nalilersuissapput. Nalilersuineq nassuaatitut 2019-imi upernaakkut ataatsimiinnermi Inatsisartunut saqqummiunneqassaaq.

*Namminersorlutik Oqartussat, ulloq 28. november 2016*

Kim Kielsen

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat  
Naalakkersuisut